



開墾一坵福田

年兜有一工早起，我趕欲出門，行到巷仔口，就看著一陣穿黃裱仔的人，有的擰掃梳，有的提夾仔，佇遐擰掃路面恰水溝，猶有一台農用的搬運車咧清運糞埕。我知影彼是福田慈善會又閣咧為地方做服務。冷風咻咻叫，看著這陣恬恬咧勞動的身影，我的心內就一直燒烙起來。

講著「福田」，庄裡的人攏會比大頭拇，尤其是對福田阿媽——周張葉蕊，逐家都呵咾甲會觸舌。阿媽雖然干焦讀過兩年冊爾爾，毋過真捌道理。十八歲嫁予全村的周家，翁仔某感情好唯是。伊認真閣守本份，毋但落田作穡，厝裡的工課嘛一項都無走閃，閣著奉待大家官。後生一个接一个出世，阿媽伊無閒甲若干樂咧，哪知拄著一个雜唸大家。伊做甲流汗，大家煞嫌甲流瀾。阿媽嘛攏無怨言，猶是盡伊做人新婦的本份，有孝序大人。

啥人知半路折扁擔，翁婿雄雄來過身。彼當陣細漢囝都才三歲爾咧。阿媽少年守寡，欲晟養四个細囝，著愛忍受足濟艱難恰困苦。牽囝的人著較儼硬，家己一个擔起嚴父恰慈母的重擔，也著內、也著外，驚囝枵寒餓，驚囝綴人袂著。生活的壓力予伊操心擘腹，一工都毋敢放輕鬆。伊定定坐踎眠床頭，看四个後生映佇一頂總鋪暎，也心酸也安慰，暗暗仔共所有的鹹酸苦澀摻目屎吞落去。雖然日子過了真艱苦，毋過阿媽伊是一个誠軟心的人，若拄著有人比伊較艱難，需要幫贊的，伊攏會盡力去做。無論是田裡鬥作穡，抑是替阿婆仔鬥洗衫，伊攏歡喜心、甘願做，毋才人緣佬好咧。久來個大家嘛予伊的愛心恰耐心所感動，佇往生進前對人講：「阮阿蕊這個新婦真有孝，後擺定著會好年老。」

俗語講：「寒門出孝子」，四个後生攏有好教示。大兄拈小弟，逐个勤學拍拚出頭天，娶某生囝閣趁錢。四个兄弟仔攏知福惜福。為著報答母恩，繼承母愛，回報社會，所以出錢出力，召集一寡善心人士，共同創立「福田慈善會」，推動救急救難，獎助貧寒等等的公益活動。周家大大細細，嘛攏是福田的義工喔。

作者：彩禾

☆詞彙學習☆

【掃梳】sàu-se/sàu-sue：用竹枝做成的大掃把。

【燒烙】sio-lō：溫暖、暖和。

【好唯是】hó-bī-sī：又唸作 hó-bī-sī。很好之意。

【干樂】kan-lòk：陀螺。

【雜唸】tsáp-liām：嘮叨。囉囉嗦嗦話說個不停。

【儼硬】giám-ngē/giám-ngī：堅強。

【總鋪】tsóng-phoo：通鋪。可以同時睡很多人的大木板床或日式榻榻米。

【拈】khînn：用力抓住固定的東西。